

四庫全書

集部

欽定四庫全書

集部

伐檀齋集卷六

四至

詳校官監察御史臣陳化龍

侍讀臣孫球覆勘

總校官進士臣朱鈐

校對官中書臣高 中

謄錄監生臣秘鐘塘

欽定四庫全書

伐檀齋集卷四

明 張元凱 撰

七言古詩

憶閩中舊遊

有序

丙辰歲不肖甫弱冠先昭毅携之薄宦鄖中鄖
楚地連秦蜀山谷崔嵬暮閩岑寂不耐採觚頰
事俠游與二三年少擊鮮射飛斗酒慰勞煦
樂也戊午歲昭毅量移閩海海正揚波戈船下
瀚羽檄紛紜歷三時而始戢閩多佳山水珍草
木得以徧遊恣采惟日不及庚申歲昭毅乃抱

米薪而解閩矣歸甫七年不幸捐館重以予之
落魄無成不堪日夕憂也不肖尚能履后土而
戴皇天哉有覩不死荏苒十年冥頑如替載蹈
奇禍鬻毛半禿肝膽盡灰假使昭毅生存何忍
見之捫心酸鼻所謂泣盡而繼之
以血者也爰動悽吟為憶舊遊詩

憶昔海波乍飛揚長鯨吐霧白日黃家君作鎮閩之疆
手提三尺擒其王幕中盡舉萬年觴鏡歌凱曲何鏗鏘
從軍未許稱王粲草檄無煩借孔璋曰余小子不好武
當筵漫學賦鸚鵡細柳營前羽戟閒芙蓉幔裏蛾眉嫵
玉勒驕嘶踏落花銀箏緩調鳴朱戶枚臯詼笑類俳優

東哲嫚戲能消愁鬪雞蹴踘沉里巷射麋置兔空山丘
喜為豪士岸白幘曾見胞人傳綠鞵貴遊造請刺磨滅
博徒之輩聊延結大道相逢脫佩鈎交歡豈必歸金埒
青州從事玉液香紅綃荔子冰肌潔壚頭且醉鄭櫻桃
一曲新聲夜月高懷中自有明珠賣座客何須綠綺挑
少年行樂常如此寧知花謝秋風起拂衣長揖武夷君
扁舟直指吳江水歸來寂寞夫差城年華屢傍五柳更
蓼莪再讀涕泗盈於今白髮有幾莖懷讒抱譖日不平

我思舊遊歌且行匣中夜夜雙龍鳴猶堪報國圖崢嶸
春日遊金陵牛首山寺漫擬龍門應制之作

萬柳暗馳道飛花度宮闕匹馬碧城隈曉向長干發長
干髻髴漢長楊玉露金莖滿路香仙人高觀分鳩鵲帝
子靈臺集鳳凰別有雙峰霄漢外空翠飛來撲衣帶烏
道孤懸出梵林松濤十里藏天籟層巖嘉樹鬱蒼蒼
嶂流霞一萬重琳宮嵌入雲中壁繡閣徊翔木末峰丹
青丘壑圖難盡綺錯山川望不窮瑞氣祥光藹畿甸周

京漢苑氤氳見鳴鳳樓臺散若星鑿龍池水澄如練鷺
嶺朱幡俯太清鴈堂紺宇千花盈明月玲瓏菡萏塔青
山窈窕芙蓉城明月青山恒若此金仙繡佛同終始龍
藏宮堯七寶臺麒麟鸚鵡獻花來織埃除埽空門淨日
月照耀中天開霓旌披拂雲旗展萬乘輝煌曾駐輦金
陵定鼎卜千年虎踞龍蟠此後先五嶽區中誰王氣三
山海底孰神仙祇遏北平戎似雨故遺白下草如烟明
時未效卷阿頌在野聊成擘勝篇

京口桃李園作時戊寅春趙敬甫鄔汝翼陳永年

同遊

三月弭帆京口渡大堤十里垂楊護故人行樂桃李園
恰有花開一萬樹爛漫常生五色霞氤氳散作晴空霧
赤城忽擁錦江流朱方即是瓊臺路遊子來回總是迷
佳人採摘還相妒拾翠尋芳樂未休相逢且作少年遊
鬪雞走狗花前隊穠李夭桃樹底謳莫將螿首疑閨孺
更傍蛾眉認莫愁團扇撲時粉蝶亂舣船飛處紅英浮

沉酣聊且眠金谷潦倒那堪控紫騮但恐芳菲易銷歇
長江寂寂流明月黃金縱有南山高難買春花秋更發
片片飛花踏作泥陰陰桃李自成蹊開時不盡一杯酒
孤負枝頭黃鳥啼

申太史招飲邸第席上漫呈

八月涼秋動城闕朔方候鴈催羣發防秋羽騎夜授衣
破賊將軍朝秉鉞無能輦下請長纓投筆書生志未成
黑貂久作長安客青苑誰深故苑情玉堂學士伊周侶

退朝為我設雞黍相對惟多桑梓言不作金華殿中語
幸覩熙朝日月新欣逢河嶽又生申掃門豈是通私謁
推轂偏能問故人慚余射不能穿札束髮空教慕奇節
歸卧南山一十春馬無羈勒車無轄我輩何須尺寸功
但令公等致時雍願言王者稱無外肅慎呼韓作附庸

春日宴弇山園呈琅琊長公

長公天下士子房安石差相似弇園美無伍方丈蓬萊
堪比數珠簾翬閣白雲中蒼峽魚梁綠水通高張雲錦

耀日月披拂玉樹吹春風巖藏洞複忽欲暝花撲飛泉
路不定蕭瑟崢泓不可言長吟清嘯蛟龍聽一望烟霞
草木深且耽丘壑不為霖玄亭寂寂無絲竹自有冷然
山水音春宵花月歡為劇入林酣暢仍浮白相看盡是
飲中仙何必平泉醒酒石慚余落魄久懸鶉自是嶽崎
可笑人葛彊頭白無推擇常伴清遊石季倫終使揶揄
滿人口青蠅白壁亦何有不能廢我嘯與歌孰讀離騷
痛飲酒古來出處隨乎時赤松之遊良可師雖然得意

東山卧無奈蒼生有所思丈夫磊砢無多嘅要使身名
俱受泰奔園歲月一杯中長公心事實鴻外

飲大司成姜公園池席上敬呈

姜公言行為世軌好似東京李元禮升堂便比登龍門
暫與同舟以仙擬一出曾為帝者師門如市兮心如水
吁嗟古道人莫容意色蕭然可以止為園築室江之干
移得青山滿綠湍五株初種彭澤柳九畹先滋湘水蘭
披襟坐對秋月朗更看寶樹明虛幌碧池隱有鳳凰毛

青雲已著鷓鴣想草木禽魚亦有文石渠金馬夢氤氳
常搖白羽團如月不著朱衣爛若雲考槃在澗聊暫寄
天心欲攬清時轡何來海內忘年交孔公座上禰生醉
知君自是名教人桀溺何須笑問津汲黯尚為前日憇
馬卿猶是舊時貧蒼生欲奪丘園志白髮能強負荷身
相逢不盡漂零歎對我常將青眼顰

吳興潘中丞上蔡張參伯小集草堂漫成長句

杏花開滿夫差城城頭初月纖纖明春風幸不棄巖穴

蓬蒿亦自來簪纓謝公暫著東山屐步兵本是江東客
一斛葡萄酒髻未星千里尊羹浮碧蕭蕭瑟瑟無歌鐘
清音忽起庭下松楚雲生棟帷菡萏吳山供客餐芙蓉
白駒空谷誰繼響鳴鶴九皋聲朗朗風標不似世中人
霞舉猶為天際想知君自是夔龍賓何事江湖欲問津
為霖為雨若有待一丘一壑非其倫愧我青袍久零落
草堂燈火同驩謔別去依然三徑荒不堪置兔堪羅雀
春日住堯峰山寺示瑞上人

誰謂東南山不高堯峰之巔何咎堯等問鶴雀飛不過
無數蛇龍卧自驕冥冥蒼靄雲樹亂風雷常走山之半
黯慘巖扉晝不開欹斜石磴危疑斷憑陵眺矚鬱嵯峨
一起一伏山如波逶迤盡逐五湖去琉璃盃內盛青螺
振衣千仞寂不語嗷然長嘯應孤嶼黃鶴仙人招不來
扁舟范蠡從茲去落落乾坤何不容吳水吳山幾萬重
此身不啻如一蟻安能跼踖悲途窮頭顱猶黑舌猶在
猶堪一日三千鍾生兒寧盡如仲謀馬上何須羨廼公

英雄事業流水盡五陵荒草秋風緊世界浮生大夢中
空華倏忽看朝槿遠公近借青蓮室猿猴麋鹿同招隱
閉門滿地白雲流風吹松花墮金粉

閒助甫參伯近有西秦之命喜而賦詩寄之

海岱烟雲開仰見日月朗頗有高世心悠然發遠想明
珠成霓玉成虹不見蕭數與艾叢乍聞初拜涼州牧乃
是河南張長公向來不與人間事消息傳來喜不寐屹
然獨立有長城何必秦關重百二丈夫高抱樂長征瀚

海天山渺去旌邠連大漠風雷色疏勒飛泉金石聲坐
鎮清風生朔野三軍盡愛寬裘者自是中朝山巨源一
麾出守看平蕃檄書不借陳琳草遊俠毋煩劇孟言獨
據羌牀圍細柳竭來殊勝東山不黃石相逢知我心蒼
生有待何能負昔時邂逅婁水邊琅琊甲第青雲連讀
君新詩如入峽絕壁騰波天倒懸我馬玄黃飢且饑何
期一見稱神駿價覓千金市與人主非伯樂誰能信由
是蹉跎一十春蕭蕭雙鬢半如銀君今新得酒泉郡應

念東吳舊酒人

喬觀察允德歲暮過訪草堂連榻旬日漫成長句

為別

西風卷黃葉堆壓門之屏霜薄身上衣冰厚爨下井偶
有足音響空谷枯桑驚散飢鳥影君為岳牧久專城朱
衣爛漫黃金橫何事蕭然却車騎獨披鶴氅尋柴荆道
遙不減漆園吏慰藉偏存甕牖生幸有新醅共君酌尚
留木榻同爰處欲說荒齋如此寒偶被風吹不能語陳

家糠覈聊自肥范叔緋袍竟誰與時昔轉輸駕樓船兩
年在君繡斧前汗血願為伯樂用心膽欲向干將懸不
遣青蠅將玉毀無奈意改如珠圓一歌雀角穿我屋再
歌黃鳥食我粟淮市曾為胯下行灞陵屢止亭中宿莫
將時命強干秦吁嗟道路難於蜀羨君官爵良不卑經
綸獻納努力為握手何當國士遇拊髀誰動明王思酒
酣別去淚如雨生平敢負喬公知

弇山園逢沈嘉則席上見贈漫賦長句為答用紀

茲會之盛

西園彙才彥主人陳思王式燕芙蓉池言解翡翠裳坐
臨秋水弄皎月澄觴飛蓋生明光遂令花萼寄紺素髣
髴簫管遺琳琅後來盛事誰則同弇園開在婁水東宥
主曹劉日方駕羽翼風雅何冲融何來四明有狂客亦
與七子相爭雄蕭然入林共把臂便覺松下生清風杯
酒相逢即定交袖中投我以瓊瑤漫試千言在倚馬獨
工五字能射鵰山雲恍披鷓鴣錦池水忽漲桃花潮座

有玉山多自歎况復錯落飛金卮高柯驚動靈鷲起長
川澹蕩天河移後人艷說今日會却如今視西園時

橫塘逢錢功甫同泛湖上功甫作歌為贈率爾酬
之

橫塘十里青山轉太湖秋水明如練菱歌纔起眠鷗驚
蘋花盡落遊魚見蘭葉浮來五兩輕葡萄一斛偏能盈
縮項槎頭銀片澗巨螯盤裏珊瑚橫船窓亂撲芙蓉綠
鷓鴣杓泛清於玉一歌杜甫溪陂行再歌李白烏棲曲

臨流擊楫烟雲開欲傾李杜平生懷相逢齷齪莫可語
眼中唯見錢生來錢生謂我才情麗鷓鴣裘上春霞曳
何為執戟風塵中折腰十載青衫敝子言疊疊真慨慷
丈夫無淚沾衣裳湖波萬頃峰七十與子携手同翱翔
楞伽精舍翠微裏松篁遶屋花盈几支郎却喜許詢至
旋開香積醍醐美夕陽明滅水上飛千山盡紫光濕衣
空門曠寂且高卧城郭偏促毋庸歸君不見初月一痕
五湖渺館娃鏡裏蛾眉巧又不見吳山落木秋風急越

來溪上戈船入僭王圖霸倏一時故宮荒寢千年思黍
離麋鹿宛然在夫差勾踐爭何為子懷和璧徒美好我
非石人不耐老歌鳳狂言祇自嗤雕蟲小技安足道但
須日飲三千鍾頽然醉倒萬事空醒來孤嶺發長嘯一
聲驚落天高鴻

陽山顧生願甫贈我長歌頗過推與乃述懷志答
男兒七尺期自愛要令姓字千秋在不然草木與同腐
富貴紛華何足數吾家驃騎從文皇賞延帶礪山河長

誰知後世賤介胃蟲沙猿鶴無低昂吾生久拚棄五斗
無奈嗷嗷啼八口身沾寸祿為人役手持破斧門挂席
逐隊隨行公府間緇塵赤汗難為顏借人瘦馬風吹倒
傳家舊帝屋漏殷首如飛蓬色如土傍人猶妒蛾眉嫵
以茲貝錦耀空幻屏居寂寂南山澗陰符在匣羞與傳
父書賸有毛萇編皎月流輝照白雪飛泉疏越鳴朱絃
雖然踉蹌人間棄但言風雅心如醉乍來破產聊自放
青山嘯傲常無恙江東復生顧虎頭自云痴絕無所求

徒倚滄浪賡孺子拍浮綠酒歌張侯貧交廿載真爾汝
何事長歌太稱許謂我斯名堪不朽做帚千金良可醜
吁嗟髮短心則長敦詩說禮聊自藏攀援今人身徒瘁
尚論古人口亦香君不見揚家子雲老執戟至今玄草
先生白又不見湘纍沉浮在魚腹世間離騷比珠玉毋
論鶡士與波臣日月文章萬古新即今青鬢不努力輟
轉白髮來侵人

寄宿田家偶述

西原夕照生平陸東臯陰陰返樵牧夜行恐有醉尉呵
驅車且入田家宿田家老翁開柴門擁篲不解犢鼻禪
青山偏近新茅屋綠酒那嫌舊瓦盆爨下一婦亦華髮
豆萁亂束烹枯鱖團圞野坐不燃藜短簷之下多明月
自言門戶無壯丁數畝山田久不登近歲徵科猛於虎
幾年蓄積消如水閨中有女年十四求鬻豪家氣勞頓
蛾眉換得金錢歸掌中空有明珠淚不記豪家誰姓名
此兒歌舞便教成婉媚自能當主愛光華漫許傾人城

前年寄米宜男草曾遣蒼頭向吾道此中梁肉厭丘坻
忍令葵藿常不飽雖然兒女情自偏不如聊且耕吾田
以色事人豈常好人間富貴浮雲然聞之長嘯斟大斗
仰見明河落高柳相逢良夜一論心別去青溪重回首

送蔣邦士守備江藩

君不見淮陰侯絳灌為伍恒自羞又不見灌將軍武安
急驚若罔聞男兒七尺不易生要令千載知其名吾今
困處蓬蒿室寸心炯炯無人識東鄰少年何瑣尾西家

老子生兒齒潦倒生平那可論區區唯有蔣侯耳蔣侯
能誦孫吳篇猿臂善開五石弦從來未肯畏強禦片言
可以服文吏畢竟二千石不攬衛尉權能作吳軍氣終
令趙璧全遂爾聲名滿人口量移遠駐江之右江頭送
別試雕弓揚葉穿來當折柳西風吹落滿地霜晨驅匹
馬上河梁寶刀脫贈泣數行英雄事業誰能當壯心寂
寞何為乎送君慷慨歌烏烏

送謝芝玉轉餉北上

謝侯年來半白頭何為又作燕京遊張生久乏資身策
厭向人間送行客冰滿關河雪滿山持觴欲飲風吹寒
貂裘攬挈慘無語歎息離人行路難年光寂寂流如電
愈見江河成世變君在行間三十年由來吾輩人人賤
丈夫所志在雄飛安能雌伏情依依周王大發鉅橋粟
伯夷甘守空山薇人各自有志士也難再辱縱謂時乎
肯復來安能長受人羈東南山之趾北山頭白雲片片
還相留即看明世無真隱何事秦時有故侯願君不負

青山約且執牙籌算行橐黃金留作買山資莫向長安
乞官爵吾先躡屩深山中君歸定訪山人蹤看君白髮
增幾許撫掌大笑滄溟空

堯峰山清暉軒落成送楞伽寺弘上人歸隱且見

余志

堯峰古刹連翠微黃茅蓋殿白板扉烏窠蟒窟僧住少
祇餘山水含清暉楞伽山中大弟子偶來飛錫披荆枳
石頭路滑雪紛紛却遇龐家老居士相期巖下種青蓮

懶乞人間造業錢，無金布地不著想。
有珠繫衣且自捐，一袈裟地無十笏。
綿叢草構為禪室，松塵蒲團日日閒。
黃花翠竹纖纖出，本來無住亦無生。
究竟何能識淨因，且將清澈寶雲升。
作供燈光華鬘身，澗底流泉鳴不止。
峰頭朗月恒如此，蝴蝶浮生夢已醒。
蓮花事業心如水，般若慈航咫尺間。
菩提高樹豈難攀，願留白足常為伴。
未許黃梅便出山。

客舍答顧願甫

燕京八月青霜飛
秦庭客子悲無衣
千里故人一書札
問我式微何不歸
馳驅失路汗無血
縱橫計盡徒存舌
三秋雨散金錯囊
十年苔繡芙蓉鐵
但願鍛羽歸故山
將雛栖息藩籬間
仰看吾國有大鳥
飛鳴有意驚人寰

初春與客即事

霏微細雨生湖濱
門前柳色朝朝新
芳草能留遠游客
黃鸝似報江南春
杏子花開好顏色
施朱著粉誰為飾
嫣然疑是東家妹
乍來窺我牆頭立
似與東風舊有情

相逢沽酒闌闌城婆娑且就壚頭醉慷慨誰論世上名
喜謝侯相過

夫差城中車與馬揚揚誰識衡門下安石能來問許詢
相逢絕少元規塵直鈞共把滄浪釣開口且向青天嘯
東鄰杏花方嫣然柳條纔可勝春烟牀頭祿米儲一斛
換酒堪直三千錢

寒食限韻作

闌闌風土不禁火綠水城邊碧油舸屢逢蹴踏花茵

欽定四庫全書

代橫齋集
卷四

時見鞦韆亂雲朶金蓮點點步底生鴛鴦彩彩纏頭躡
越女曾為兵館娃周郎只合留江左前溪桃樹隔垂楊
髻髻紅妝隱青瑣

楓橋與送者別

楓橋秋水綠無涯楓葉滿樹紅於花萬里之行纔十里
闔閭城頭尚堪指遊子尊前淚濕衣離心已逐片帆飛
酒酣不識身為客意欲元同送者歸

揚州春眺卽事

紫萸村邊揚子灣
黃公壩頭使者關
舟楫遠通淮北水
樓臺近見江南山
高岡百尺臨官渡
浮烟不盡斜陽暮
前朝楊柳幾株存
寒鴉飛盡燕城路

客堂秋夕

高梧百尺入雲涼
清水一池生月光
秋夜初長客不寐
坐聽砧聲思故鄉
明河輾轉天欲曙
寒螿唧唧猶自語
挈衣起寫故鄉書
明日關河鴈南去

新豐主人

新豐主人邯鄲婦依然賣酒三河口
芬芳芍藥氣如蘭
澗澗葡萄綠於柳東風日日飛輕塵
遊子年年只問津
遲迴立馬門前客曾是壚頭醉臥人

伐檀齋集卷四

欽定四庫全書

伐檀齋集卷五

明 張元凱 撰

五言律詩

郊祀伏覩駕出二首

馳道千官集緹城百帳分天行清蹕雨山出護宮雲輦
轂龍真見旌麾鳳有文此中駮乘者應是霍將軍

上帝歆元祀南郊啓閔宮幸逢堯麗日仰見舜重瞳仙

樂聞難盡霓旌望不窮材官多侍從偏我隱牆東

春日游西苑二首

宣室臨西苑靈臺對籍田宮鶯迷綠雨廐馬飲清川柳
引金堤直松含玉殿圓先皇受釐處寂寞鎖春烟

禁雲流不盡苑樹碧叢叢水淺鴛鴦島花深翡翠宮引
泉珠錯落疊石玉玲瓏莫認桃源路銀河豈易通

部餉至京引見皇極門時戊辰九月五日二首

玉几星垂拱金門旭始開夔龍端簡侍揚馬執經來靈

曜瞻難定神飈曠易迴進呈鹽鐵論付與度支裁
雲日散高秋鐘鳴五鳳樓面君今日喜在野十年憂下
走慚簪紱前驅媿蒯緱無能馴鹿性終爾怯螭頭

引見賜宴恭紀二首

天語傳聞近山呼引拜遐鴻臚蹠承旨光祿立開衙白
粲分階玉黃流借殿霞徹歸成獨享此際益思家
重漕明主意既醉遠臣心席避彤庭日筵依松樹陰大
官多且旨小史酌還斟世食天朝粟銜息豈自今

長安春望二首

鶯花鳴鳳曉鐘鼓
濯龍開湛露
仙人掌晴雲
日觀臺河
將銀漢去山向玉宸來
輦下陽春曲能容騎尉裁

太和盈宇宙爛漫徧光華
美麗都人綺芳菲輦道沙
紫騮銜禁草黃鳥卧宮花
一望千重殿常生五色霞

長安街伏觀莊皇帝梓宮歸山陵二首

虎賁趨上將龍馭從羣仙
幃幕靈芝蓋祠壇瑞玉筵
進賢冠未毀斬佞劔猶懸
帝子真純孝冲年淚似泉

薤露盈馳道臣民候輓齊山河俄改色草樹盡含淒象
衛過金馬芻靈出碧雞有髯攀不及悵望鼎湖西

朝皇極殿頒萬曆改元歷時壬申十月朔二首

鳳凰栖沼上鳩鵲朗雲中周室方全盛成王在幼冲休
徵方出洛天壽盡呼嵩卜歷元無算編年萬未窮

湛露收青漢雲韶出紫宸頒來一統歷散去萬家春宣
室重禧肇明堂受命新世臣唯飽飯常作太平人

觀象臺看雪二首

人間寒逾切天上瑞先呈不辨黃金屋唯看白玉京風
花連漢時冰葉滿秦城此日觀乾象璇璣分外明

銅龍高失翠玉尺旋生華星宿靈妃府瓊瑤帝子家光
留長信月影亂上林花一望銀潢接尋源未有槎

席上呈申太史二首

几席留明月花枝帶禁烟酒釀分玉醴燭短剩金蓮史
是遷之後文如漢以前且辭長夜飲蚤起從甘泉
夾道通仙署清槐無世塵寂寥桑梓客叅對草麻人露

掌銅龍近天顏金馬親治安垂萬世公等綰絲綸

訪胡原荆侍御

相逢宣武第暫解惠文冠清淚長安盡秋霜短鬢殘
烏纖月落鳴鳳上陽寒聖政元無闕封章莫浪彈

飲馮杜二使君

暫罷金鑾直來為雞黍期大馮元補闕小杜亦分司
草防人見觥籌任客私故園凋落盡不是在家時

贈晉陵王太學二首

五侯千日醉七貴一家親
避地依京洛愁身浪笑頰青
衣歌宛轉白眼看沉淪
何似金門客嗟嗟歎積薪

羨爾遨遊美何知旅食艱
長楊馳馬去芳草踏歌還
久住唯金谷常顏是玉山
燕姬新買得江上杏花顏

潞河中秋初度二首

壬申

問年逢六六逆旅自玃玃
白髮須臾事黃金烏有生據
鞍寧待試邀笛不辭行愁絕
今宵月重圓薊北城

桂影青天滿桑乾白水斜
公車不待詔客舍祇思家
報

主雌雄劔謀生子母瓜去年今夜酒吳市聽琵琶

廣福寺寓二首

不夢麒麟閣皈依孔雀王蒲團間裏過藥裏定中忘宴
坐霞餐晚清言水觀涼空門無一事養就懶嵇康

白壁空投路青山且息機隙駒憐促影怖鴿倦雄飛跡
許畸人識心甘靜者依塵襟方欲澣暫借水田衣

送原荆歸田二首

敢言身詎惜悵別袂難分徒步燕山雪悲歌易水雲網

常一疏見慟哭兩宮聞不遣長沙去君恩厚漢文

大憇微臣罪餘生聖主留遲迴方出晝黯澹似悲秋妻
子諳田作親朋仰歲收青青桓氏馬不見玉街游

醉宿幼元寓二首

方朔栖金馬文園卧錦茵遠攜陽羨秫乍釀洞庭春紅
樹搖歌扇青衣動舞塵沉酣自吾黨休沐官嫌頻

為歡常卜夜不厭酒淋漓濕爾鳳毛好濡吾燕領竒放
歌驚宿鳥深坐待朝曦却洗何人事高陽酈食其

送朱在明使楚

十里河梁暮天寒送子遲冰堅車亂度雪厚路多疑大
別江平掌九疑山畫眉長沙銜使命莫作逐臣悲

同幼元飲光祿署

縱飲防人見盤餐竊自傳黃流銀海注翠釜玉繩懸柳
外君庖迫花間仙署連大璫來絡繹臂以綠鞵纏

潞河雪二首

十月燕山雪孤舟潞水涯沙灘銀浪細岸柳玉條斜逐

鷺寧分羽栖蘆欲混花蓬牕莫令進易惹鬢生華

雪霰今朝集寒冰昨夜堅
幸存東郭履不賦北門篇
客路黃雲外鄉書白鴈邊
關河無鎖鑰偏阻未歸船

塞下二首

都護稱飛將提兵禦犬戎
楚弓斜抱月邊馬競追風
魏絳和無議秦開戰有功
黃金新鑄印擎出大明宮

乘鄣蠻雲白行營漢月新
回中牧馬地句注引弓民
傍夏不消雪入關纔有春
天王大一統冒頓久稱臣

少年二首

長楊馳馬去平樂，鬪雞回婉媚。貝為帶，歡娛金作罍。橫
行羨田竇，侍從陋鄒枚。不惜耽荒宴，朱顏良易摧。

桃李芳菲候，流蘇春帳懸。文君侍琴瑟，太主發金錢。玉
具芙蓉劔，銀裘瑪瑙鞭。單車花底散，人望儼如仙。

折柳

三春楊柳綠，一望淚潸潸。匹馬此曾繫，長條忍再攀。翠
凋愁裏鬢，紅減別時顏。風絮輕千里，將心度玉關。

邊月

半輪升古塞長劍度河堤
遼磧黃狐穴連沙白鴈棲
軍聲傳薊北霜色滿遼西
此際征人淚應同少婦啼

閨思二首

夫婿蕭關外音書寂不聞
朝朝江上石夜夜枕邊雲
鸞鏡元羞妾蛾眉好待君
還將絲一寸繡作錦迴文
夜夢空飛遠朝心鬱不開
寶釵寒翠羽瑤瑟長青苔
花辦粘蜂去晴絲罨燕來
前魚無暇泣別鶴恨難裁

薄命

三載食君貧嚴霜六月侵但能留一劍何惜抱孤衾鏡裏花如貌人間石比心羞他機下婦含笑為黃金

青樓

女郎能任俠結客少年時容顏市金幣肝膽刺恩私密約來原劇窮交自屢屐信陵歸魏後何以報如姬

春讌二首

燕寢氎毼榻雕盤澗沚毛將軍青最幸詞客白猶豪華

金剛經疏 卷五
月高梧影冰絃流水操兩行紅粉在誰是鄭櫻桃
錦屏開子夜珠履集春申諛鳳非無客圖麟合有人樽
前搖白羽花下卧朱輪妙舞清歌後幽懷可具陳

寺居二首

穴處聊同蟻巢居反借鳩偶來依淨土常自對滄洲雲
亂竹間度泉分花下流未須論出世吾自乞吾休
未定去來意其如生滅何捨身能忍辱聽法可降魔白
日一僧語青天雙鳥過悠然會心處潭影印松蘿

贈客

明時難自見，牢落不羈才。
富貴浮雲耳，乾坤傳舍哉。
寧憂塞馬失，呼得野鷹來。
王粲愁亡賴，同登江上臺。

社日

春社散柴桑，遲迴度石梁。
飯牛嗟百里，割肉笑東方。
細雨青山濕，桃花流水香。
野鷗渾狎我，飛近撲衣裳。

偶成二首

家貧常罷尉，身懶似逃名。
繁弱提偏重，岑牟著更輕。
柳

疎鶯晚逗花落蝶先迎食肉非吾分持螯過此生

不樂區中偈言從方外遊人嘲笑用解客難曷為酬貝
葉經三藏蓮花酒一甌生涯問流水天地竟虛舟

訪客

故人金馬客消渴卧文園岸幘高梧影援琴流水言竹
籬黃蝶亂野薺白花繁枳棘中原在毋脂日暮轅

旅思

不盡桑乾水潺潺浸月寒關山悲短笛兒女憶長安秋

半青蘋老霜前白苧單南歸多鴈影欲寄一書難

飲顧從化

已分時才晚唯憑杯酒深五經堪棄擲一第尚浮沉
種種悲吾髮青青惜子衿蛾眉羞再畫無奈入宮心

濟上逢張漕尉

濟水遶船流蕭然獨樹秋暮雲停楚騎明月出吳鉤
主計張蒼棹沉酣李白樓不堪思往事零落半同游

送楚客之越

京洛一為別念君多苦辛啼猿常送客歸鴈遠逢人十
載辭江夏千山過富春匣中雄劍在拂拭氣還新

別廣福進公

湯休能惜別相送出精藍水長陂全沒雲低雨半含不
堪寧止七見黥欲過三此日人猶北驚看鴈已南

有感

風塵猶道路湖海自浮沉浪說交張耳何人識季心霜
留三尺劍星散一囊金落落飛騰志空知返故林

寒食

旅食悵猶寒
春愁匹馬間
山河壯燕趙
風土憶荆蠻
驛路桃花落
鄉心燕子還
餽餅嘗未敢
千里隔慈顏

飲子念新齋二首

野服都裁芟
儒宮半藝蘭
鶯花春有約
雞黍晚留歡
種藥乘膏雨
栽松伴歲寒
絕憐俱老大
蕭索竹皮冠

蓬徑間堪掃
山窓卧亦堅
蛾眉為世棄
雞口漫人前
北海刺常滅
南州榻屢懸
竹林多酒伴
祇賞步兵賢

江樓

高閣憑揚子登臨傷客心
雲青山有色潮白海生音
落日靈均廟秋風莊鳥吟
大江南去路惆悵暮歸禽

山居

一室蓬蒿翳悠然紫翠深
涼颺起松上夕照出花陰
流水沉冥意空山久住心
寥寥問孤鶴千載孰知音

西山訪叔平丈二首

耆舊尋龐德西疇扣綠扉
開樽燕子到點筆杏花飛
獨

鶴尋魚穴孤松挂薜衣從游多鹿豕久矣故人希
清言聊共晤白髮竟忘愁柳暗門常閉花飛村自幽存
交憐故尉往役見諸侯濁酒時相慰山田薄有收

與謝都尉山游二首

山水逢皆勝冠裳見自疎白蓮同結社黃石未傳書東
郭貧非病西林樵可漁為君容借屐不問出無輿
湖海能容我微官安事哉先朝存帶礪今日置寒灰要
妓歌穠李尋僧吹落梅差強投筆吏不得玉關回

金史卷之八十一
卷五
瑯琊別墅二首

高閣臨花渚雲英逐望新空濛微見海窈窕曲藏春喬
木元無恙青山已即真君家舊時墅曾住兩珣珉

鄰剎松濤遠隔川花雨輕雲峰分太華池水半昆明浮
白消塵慮耽玄匪世情超然得禪悟園以小祇名

幽居

烟霞元自癖寤寐向誰論淨業蓮為社青山鹿應門暫
留徐孺子深避竇王孫為語冥冥鴈中原增弋繁

餞客

細雨孝廉棹經過
芳草城渚雲飛不盡
山月正初生
白恰談名理清樽惜別情
如逢燕趙客為報厭縱橫

贈子念二首

吾自識曹丘同為長者游
下帷虛董策借筋竟良籌
清聖元無羨情痴卒未休
花間呼小友張緒最風流
謝傅愛羊曇東山日竝驂
稱名當第五受爵敢過三浪
謔曾無虐風騷祇自耽
庭花莫間種芳草樹宜男

濠上逢客

相逢木蘭棹同過渚蓮亭散髮新添白看山不改青種
花無舊業視草有玄經寂寞江湖上常占處士星

送客之滇

始遂四方志何知萬里長雪消猶故國草綠已他鄉旅
鬢欲垂白行囊盡點蒼巴江元學字不阻校書航

訪顧朗

野徑莽無迹山園標有梅客能騎馬到主自飯牛回藉

草深跌坐臨花淺送杯狂生今爾汝清話總成詼

逢王承父

葦葉梁溪舫蘋花秋水風兩人斗酒共千古寸心同詩
是山東白才非吳下蒙詞壇分赤幟吾黨小英雄

同衛僚遊虎丘

徹侯戎理暇小隊出城西金勒材官鞚銀瓶健卒提雲
根堪試劒蘭葉亦然犀為作軍中樂林鶯不敢啼

過鄭丞

鄭公門似水楊柳綠如絲自哂官階小那嫌堂構卑飛
花竟亡賴歸燕不愆期投轄人皆醉毋煩置驛為

端午二首

風雨淹佳節寒裳獨采蒲久無觀妓詠近有辟兵符竹
徑留中散江流憶左徒乾坤自拘礙吾意只菰蘆

角黍綠離離茶瓜與客期短衣懸艾艾長命續絲絲燕
乳過初夏蜂喧恰午時葵榴幸無恙折取伴芳卮

送魯都尉武試

送子一樽酒離歌秋月明龍韜悞章句燕領起諸生白
水交河道黃雲碣石城不須愁短髮亦可請長纓

遇京口程秀才因寄朱將軍

羽檄關河靜風塵客路分相逢伯休父因憶季將軍組
練長江雪旌旗建業雲還應賦秋興不草出師文

客夜

劍鋒消不盡一室欲飛霜孤戍猿聲裏高城烏道傍風
塵存季布肝膽借田光我馬玄黃色傷心去路長

家信

鴈高呼不下憑汝報平安作客年年別為官事事難
黑貂孤淚夜白髮一絲寒愁絕江南信梅花雪後殘

伐檀齋集卷五

欽定四庫全書

伐檀齋集卷六

明 張元凱 撰

五言律詩

出塞二首

赤幟空郊壁朱麾滿漢營
受降當夜半飛捷入春明
賜錦麟裁就懸金鵲化成
璽書頻慰勞天子重干城

列騎獵飛狐龍城出虎符
寶刀寒太白繡甲卷天吳
都

尉稱強弩將軍字破奴控弦三十萬踴躍取休屠

俠客二首

六郡連三輔秦城接楚疆無非遊俠地總是少年場萬
戶片言得千金一擲亡青樓多艷婦雖老覓徐娘

平生未識愁出入富平侯疆灌令人醜居間倩客籌乘
黃千里駟狐白萬金裘厭說雕蟲技梁園只浪游

隴水

隴水隴頭清氏羌隴下營不堪刁斗亂况復夜猿鳴轉

戰黃雲合尋源白髮生月明邊籟靜腸斷此中聲

落梅

清夜梅花落冰霜行路難金微殘夢遠玉筵一聲寒馬
上憑誰寄閨中只獨看忽流明月影雙淚濕闌干

婕妤

長信懸孤月增成愁望中身輕不如燕那敢怨東風流
水朱絃斷飛花舞袖空還將辭輦意隨分處深宮

明妃

單于願稱壻宮女出良家犀帶黃金飾旃裘白雪花照
來猶漢月看去已胡沙握髮羞明鏡飛蓬恨未華

憶別

別去彌年載容華異昔時鏡分殘兩月絃斷散千絲雨
淚含花臉春愁結柳眉歸期聊出卜多露曉行遲

堤柳

大堤千樹柳盡是故倡家憨態向誰好柔枝空復斜掌
中身似燕釵畔髻如鴉遮莫思張緒無心折杏花

從軍二首

結髮事戈矛，新從定遠侯。
橫行非面謾，感激許身酬。
烽火消雄劍，燕姬脫戰韉。
軍中無飲器，好借月支頭。

仗鉞出甘泉，將軍秋備邊。
驛弓善猿臂，鳳鎧稱鳶肩。
結客通中貴，擒王得左賢。
功名陋田實，麟閣許誰先。

銅雀

奉寢傳遺教，留歡覓故心。
夢為雲雨薄，恩向死生深。
懔解猶織玉，香分剩鬱金。
可堪漳水月，夜夜照孤衾。

芳樹

芳樹映窓紗容華散早霞臨妝恐生妒
褰幔故相遮欲結同心子先開竝蒂花
東風莫吹落夫壻恰還家

湖上讌集二首

桂楫出橫塘蘭陵綠酒香露桃無賴色
夜月可憐光客賦元鸚鵡山名是鳳凰
江南風物麗羅綺儼成行使者解金龜
春風倒接羅柳絲縹燕子花瓣掠魚兒
水綠平鋪綺山青遠畫眉落梅新製曲
紅袖隔船吹

朗上人林泉二首

築室栖支遁為園象給孤流泉動朱瑟松露落明珠
施食山禽睨翻經野鹿趺言尋許玄度先遣具醞醕

古木藏精舍春風日閉關飛花自容與乳燕任游閒
禪影清池上經聲綠竹間何須攜錫遠自有赤城山

郊外

野望曉蒼蒼川原喜載陽雲飛山動影露濕草生光
柳下尋元亮花間遇仲長攜來一壺酒開與故人嘗

友人新齋

草構方除舊蓬門今始開春衣黃似柳歲酒碧於苔野
水從傍引山花取次栽孔融新第宅張儉又輕來

觀獵

都護班師日龍城會獵齊兔藏鷹側目鹿失馬穿蹄詭
遇元干律偏師亦自提擒生市斗酒明月灞陵西

朱樓

結綺蘭芬散臨春環珮鳴黃金壽爰叔綠酒醉陳卿隱

几三眠柳迷花百囀鶯朱樓巢翡翠燕子陋為名

同黎徐二帥游南屏山二首

並騎驂騮美芳郊桃李穠酒光明琥珀山色秀芙蓉衛
霍春多暇鄒枚日過從材官俱樂部凱飲至奏歌鐘

柳下對呼盧朱絲繫玉壺綺羅臨水亂鼓吹入雲無紅
杏村村雨青山處處湖步兵良醞具不問酒家胡

春閨二首

羅袖裁全足輕盈出桂房柳眉鶯睥睨花靨蝶顛狂夜

金史四八
卷二
月求凰調春風墮馬妝良人知未返較獵入長楊
應識嬌亡賴懸知態盡愁采芳非怨女帶草是宜男窺
玉全生妒留髡半倚酣無憑雲雨夢都使寸心含

晚步二首

偶來尋野寺忽復過柴桑聽鳥竹林下逢僧流水傍綠
雲生麥隴斜日上魚梁嵇阮時相問黃公尚賣漿

楚客混漁樵清溪散步遙澗藤栖暝翠山磬韻春潮野
興花能引羈魂酒可招久無甌冶佩常挂許由瓢

岫嶁山居二首

巖扉對靈隱山閣啓清暉
水淺溪如剡花深曲似韋
觸人香麝過背客錦禽歸
飛瀑飄晴雪冷泠濕我衣

窈窕桃源路漁樵只浪猜
巢居同幻住峰影逼飛來
烏几雲流濕黃庭風展開
彼將身隱矣吾豈避秦哉

贈阮都尉二首

砥礪收民譽吹噓借士評
一官成皓首五字擅長城
對月吳鉤躍臨風越甲鳴
漢庭徵老將猶可代專征

南阮貧如昨步兵猶可憐吁嗟威武士寂寞廣文韞幸
有官廚酒曾無負郭田建安多麗藻誰在詠懷前

園居二首

種柳門初綠浣花堂亦深祇將投筆意不負灌園心獨
抱廬中膝時操絃外琴翻嫌扣角者颯颯動商吟

買得釣魚磯依然晝掩扉小窓攤蠹簡斜日曬牛衣亭
子烏皮几山妻白苧機柴桑不開徑彭澤敢言歸

晏坐二首

日接林中侶時來方外羣楚山隱几見羌笛卷簾聞綠
樹啼黃鳥青天流白雲北窓閒悅繹柱下五千文
揮塵青松淨披衣白苧輕斷霞歸嶼迥纖月墮江明清
嘯嵇中散沉酣阮步兵何知身世促咄咄但謀生

廣陵遇客

敝裘仍歲月短棹只菰蘆歌鳳身留楚負薪家在吳倉
庚三月雨平仲一城蕪零落東西去高陽舊酒徒

彭城

去國久為客思家更屬秋
鮫人月中淚燕子水邊樓
綠樹帆飛度青山雲亂流
可堪張仲蔚借住李膺舟

魯橋

鳧繹青嵐近龜蒙黛色連
看山渾不厭把酒正相便
津樹常遮月沙灘少住船
平生擊楫志都付卜居篇

過王文學

作客三千里為儒一畝宮
蛛絲縲戶上鳥跡篆沙中
解佩湘臯共藏書鄴架同
沉淪何必歎著述起王通

魏季朗貢入太學寄贈二首

驅車隨計吏杖策度黃河
岳色凌空下雲英夾日過
夢懸金馬隔路出碧雞訛
千古英雄事居然限制科

握中神物在淪落世猶驚
照乘三光失支機五采生
解頤周列國抵掌漢西京
若說雕蟲技翻令意不平

金陵徐園宴集分得壺字二首

盧橘園千頃葡萄酒百壺
溪聲來遠瀑雲影曳流蘇
花落紛迎蝶萍流曲引鳧
主人能好客當代執金吾

鳳凰猶館榭朱雀半蘼蕪公子元封魏佳人本姓盧雲
霄開甲第歌舞出名都不羨金為埒唯憐玉作壺

晦迹

清時真自失世路豈相援晦迹蠖同屈雄談虱屢捫絳
袍存國士脫粟進王孫執戟艱危在秋霜拂淚痕

漫興

欲移愚谷住乞得醉鄉封久自甘人棄難為悅已容時
情輕馬走世態厭龍鍾落落沉冥者吾師阮嗣宗

清郡訪鄭丈二首

處士芰荷裳相將舞媚娘竹枝新度曲桃葉舊憐香碧
椀銀絲鱸冰壺白玉漿清泉自銷暑落月尚飛觴
白首美遨遊他鄉行樂稠朱絃被琴瑟綠樹繫驂騑虛
席迎無忌傾囊問莫愁每勞銀不律只為錦纏頭

清郡大寧寺二首

借住元常住深藏是善藏注瓶泉水冷開卷法華香古
檜如虬偃新松比鶴長紅塵將赤日亦避寺清涼

初地能逃暑中宵暫問禪
草中生熠燿藕上吐嬋娟
同舍病摩詰東鄰老鄭虔
吁嗟坎壈歲懺悔佛燈前

兗州曉行

殘月照征衣村荒人住希
三星猶耿耿四牡正駢駢
岱翠雲中落霜華劍上飛
經過獲麟處吾道淚堪揮

沙河道中

洲渚河流剩沙堆風卷餘
牛羊紛認牧禾黍亂成畝
棗熟人憎鳥荷枯獺趨魚
秋霜欲侵鬢愁絕獨驅車

天津遇只都尉秉忠

匹馬西京路風塵遇冠軍
姓竒希見世名美不忘君
邀笛關山月登樓海岱雲
相看頭尚黑塞下可邀勳

歲暮過淮陰

搖落出燕市倉皇過楚城
黃金隨歲盡白髮待春生
雪後鶉衣重風前草笠輕
幾年悲命運握粟問君平

渡江

十二月將盡三千里外還
船猶衝白浪家已近青山
暫

罷窮途哭難為故國顏解裘無長物朔雪處囊間

春遊與謝都尉二首

柳市栽春服花郊費酒錢家貧不事事行樂自年年黃
鳥催提榼青衣佐刺船未須投逆旅芳草正堪眠

春草綠盈盈飛英撲馬輕秦樓臨曲水謝客是宣城柳
弱丁年態花嬌子夜情昇平無汗馬都護聽流鶯

滕村訪姜太史二首

逶迤桃李徑駘蕩自陽春祭酒門如水江干雨似塵苔

生陶甕潤花發董帷新何事登封日猶聞禮樂臣
玄亭耽寂寞春雨碧氤氳竹淨軒窓色蘭滋几席芬人
倫郭有道時命李將軍莫便營東墅蒼生孰舍君

焦山暘公房二首

孤絕江之島棲遲隱矣身迷花暈似綺在藻鱗如銀高
枕流雲覆清言白日淪山中許玄度支遁好為鄰
山逕緣蒼渚松寮掩翠微斷崖猶鶴碣三詔尚漁磯衣
楚青荷葉江明白板扉臨流當洗耳鷗鷺不驚飛

贈朱別駕

嵒脊曾無匹西京石建如每移青玉案恭展紫泥書善
政遺三輔浮名謝二疏通家能畜我早晚侍安車

答許主簿

馬曹一主簿七十尚棲遲簪筆推先輩懸車悵後期傾
交霍去病仰給鄭當時年少余官薄何然動爾思

子夜

花柳發韶年妝成子夜妍弄簫成艷曲調瑟豈哀絃翡翠

翠巢金埒鴛鴦撲錦纏不將銀燭滅看取玉人憐

騮馬

紫騮元異種剪拂倍光輝但遣銜金勒何知有鐵衣
嘶承顧盼踠足戀芳菲笑殺征西騎沙場百戰歸

吳氏園寓二首

落落燕山路勞勞楚客身莫尋彈鋏伴且作灌園人
白眼誰堪傲青樽自慰貧桃源今負郭借住豈緣秦

高柳拂清池名花開自遲染猩山躑躅堆雪野醪釀亭

子留行李園丁烹伏雌再聽渾不厭隔水嘯黃鸝

贈錢功甫二首

潦倒經生業淒涼國士心
愁容非酒病憨態為書淫
再別荆人壁空懸燕市金
魏其賓客盡怪爾獨相尋
薄宦唯吾拙諸生爾獨貧
他年文苑傳今日士林人
蝕字真如蠹牽衣故作鷄
未須嗟濩落晚貴最平津

歸客

寂寞丘園卧休論戰勝肥雲英流几席山翠濕裳衣梅

福辭人役桐江有客歸海鷗飛且止相對已忘機

徐園

綠徑依山轉朱樓抱水斜臺前五松樹雲裏九蓮花縹
緲疑仙館玲瓏象主家金昌亭下路標起赤城霞

和子念移居四首

花雨燕泥香綢繆牖戶傍昔移唯破硯今徒益匡牀賦
草多鸚鵡衣囊少鸛鷗自能貧任俠孰謂醒而狂

為愛蓬蒿宅悠然綠水涯長貧室懸磬解笑女如花劇

孟初豪舉袁絲舊狹斜十年渾借住回首伯通家
長日罷樵蘇青林聽鷓鴣無詩不似舅有論即潛夫岸
憤流雲度閉門芳草敷敢勞遷幸舍宵浪哭窮途
未以窮愁逼因為時態憐對人唯嗒爾閱世更茫然痴
叔元非黠狂奴固自賢輸吾弄杯勺歲月只高眠

東鄉舟中即事二首

西風潮不上河淺路逾賒藻盡魚依葦陂荒鴈啄麻丹
砂楓樹葉白雪木棉花故國猶羈思停舟問酒家

日落停撓處天寒獲稻時
樵蘇機下婦筐蟹澤中兒
馬
捱餘殘豆雞時傍短籬
黃花霜後在不負野人卮

除夕二首

丙子

黑貂身作苦白雪鬢何辭
懷匹夫罪亡金同舍疑
世情顏遠識時事楚狂知
四十明朝是無聞敢自嗤
不盡棲遲意還深兒女情
隱何論大小術已厭縱橫
敝帚藏家重寒灰置道輕
不須吹玉律春傍酒杯生

弇山園席上二首

倒着接羅長山游與葛疆溪流如罨畫柳色自滄浪卜
夜芳卮溢乘春藻翰香子淵新著述祇是頌明良

安石營新墅高陽總舊游鷗邊橫短棹花際湧高樓河
朔彌天飲蓬壺縮地游孟嘗門下客偏我黑貂裘

越溪莊二首

幽徑花如浣閒門柳更垂山邊韋氏曲湖上習家池會
意禽魚樂忘言桃李枝蘭亭幸無恙猶似右軍時

允矣幽人宅悠然山水區隔花深避世負郭薄存租園

竹三千个牆桑八百株步兵恒信宿暫止泣窮途

山中逢顧山甫不得過訪


山人以山字在世辭世諠不改箠瓢樂而為風雅言龐
公鹿門宅陶令柴桑園地僻杳難到白雲空飛翻

楞伽寺讀書

常住無人識諸僧日與驩并嫌留短髮何意戀微官歲
月窮千卷行藏老一簞草堂青嶂合春雨響琅玕

同毛仲章立墓山食櫻桃

湖水淨如練
禪扉晝亦關
白雲流綠竹
朱果照青山
鳥見無人下
僧聞有客還
筠籠滿相送
何必禁園頒



伐檀齋集卷六

欽定四庫全書

集部

伐檀齋集卷九

七至

詳校官監察御史臣陳化龍

侍讀臣孫球覆勘

總校官進士臣朱鈐

校對官中書臣高 中

謄錄監生臣宋國瓚

欽定四庫全書

伐檀齋集卷七

明 張元凱 撰

五言律詩

至日同傅吳令石湖鵬詠二首

長至傳杯永陽舒坐嘯開飛霞同出寺落日又登臺
阜蓋乘箕下青山擁琴來書雲諸彥事誰似大夫才

問俗五湖傍扁舟小隊藏憂心懸赤子淑氣動青陽漪

藻忘冰候巖花遲歲芳不緣仁政異山水倍生光

送沈居士泛海禮補陀山二首

居士獨乘桴靈山絕世孤風濤空裏籟島嶼鏡中圖
大海元清淨浮生任有無明州阿育塔光現照歸途

寶筏滄溟渡皈依妙相前海潮殷梵唄花雨翳空烟
借鮫人織燈因龍女傳此中聞最上見在福無邊

過張幼于曲水園因贈二首

家近館娃宮為園曲水通憂時憐賈誼治郡憶吳公
春

雨竹間綠流泉花下紅一樽今古意不盡鳥言中
不仕人猶貴逃名事豈賒久將忘月露漸以寄烟霞覆
甌無非草如椽總是花五車親著述何羨鄴侯家

歲暮二首

殘歲風兼雨畸人病且貧鏡絲俄染素甌草欲棲塵常
是不得意何如無此身但牽良友約春到笑歌新

風雨漂搖日將離止舊巢僅能存故步何恤失前茅金
盡僮違約官休客善嘲五湖春草綠吾豈繫吾袍

題傅吳令齋榻

棊榻聊爰處蒲團半借禪夢將蕉鹿辨德以木雞全歌
枕看山月披襟嗽石泉好携青瑣去莫問管寧穿

題徐氏悟香庵

香界同蘭若經函借苾芻花枝生滅幻雲影去來無忍
行全依草慈心徧及鳥不須重捨宅此有小浮屠

賞海棠次韻

海棠開爛漫華館共徘徊色受羣芳妒香因太豔摧枝

枝供麗曲朶朶勸深杯恍惚花神馭巫山行雨回

牡丹下夜集

綺窓雲半護香氣霧相和為惜春光盡翻憐夜色多客
歡方太劇花態轉微醺欲遲朝霞至明星奈爾何

春雨

垂垂春雨密黯黯暮雲低鶯濕翻尋谷花殘自委泥青
山違抗跡綠酒洽幽棲五柳門前水依然與岸齊

閉關

余本餐霞客曾無愛獨醒
蹇修元迂俗靈鑒自沉冥
竹帛春雲散榮華早露零
閉關誰最善頌酒得劉伶

金昌亭送客

客子欲分袂離亭戀夕曛
樓臺吳澤國舟楫楚江濱
樹外白雲斷城隅綠水分萍浮
千萬里何地更逢君

題公瑕丈覺海山居

林栖依覺海雲構接支硎
斜谷緣疇轉迴嵐抱宇青花
枝疑杜曲流水學蘭亭為愛
鷺羣好曾將換道經

江村同方山人子服過寒山寺訪旭上人

曠適柴桑叟
栖遲蕭寺鄰
貧家春酒綠
細雨杏花新
澹慮全輕物
忘機不畏人
遠公能好客
因爾得相親

湖上歸

野寺垂楊外
湖陂亂葦間
翠含千樹雨
青露一痕山
果熟喧童口
桑稠礙女鬟
漁舟小如葉
載我洞庭還

寄晉陵吳生

永夜寒吹角
江天獨倚樓
以君懷璧罪
同我戴盆憂
雁

影吳關斷蘭芳湘渚留長安聯轡日曾與酒人游

芝玉北歸與小飲

余抱三時疾君歸萬里遐馬蹄霜路草人鬢雪山花堆
堞栖殘照魚梁度斷霞金昌縱凋落醇酎可頻賒

山甫長倩過慰作

坐歎尊無綠行歌園有桃燕山曾送別楚水又離騷月
白清猿近天寒旅鴈高可憐張仲蔚不得住蓬蒿

送幼于之南都

洛邑今江左當年我再過每經桃葉渡愛聽竹枝歌
綠樹丹陽渺青山白下多未須重弔古時事近如何

秋日有懷子念

蕭瑟清商候長懷滄海君把杯重問月染翰幾停雲
桂向淮山老蘭從楚澤分獨愁萍散處漂亂白鷗羣

嘉則丈過吳值余抱竒疾而懼叵測也辱長篇慰
勞率爾為答情見乎詞時辛巳六月三日二首

每動良朋歎偏傷逆旅魂病居葑菲體家住虎狼村
貧

也如懸磬天乎尚戴盆祇令心盡死翻訝舌常存
豈是乾坤窄還疑日月偏鄒陽書在後樂毅謗居先行
間金烏有圖存酒可全此邦黃鳥什羞與故人傳

舟次

轉蓬猶日暮落葉滿河梁楚地愁來速吳鄉夢去長浪
翻千片月人靜一船霜不盡孤征意山猿與斷腸

留客

草舍鄰蕭寺柴門隱竹叢榻容徐孺借杯許故人同亂

水秋逾碧孤芳晚更紅
前溪垂釣處已在月明中

寄遠

錦字三秋隔萍踪萬里浮
祇憑新月旦無損舊風流
眉黛張京兆腰肢沈隱侯
文園多病後好寄鸕鷀裘

水上

短棹菰蘆出長謠水上聞
山青才歇雨湖白欲生雲
浪轉鷗無跡沙迴藻有文
渚蘭隨可采寧待楚人分

傅吳令初度

茂宰行春遍芳辰
初度臨飛鳧雙赤舄
鳴鳳一瑤琴不
盡風雲色俄成桃李陰
護花在東郡偏繫使君心

宿沈道士館

信宿玄都境逍遙十二樓
蓬萊非遠道鸞鶴不多儔
明月懸為佩春雲覆作表
碧桃千萬樹挾爾鳳笙遊

千手觀音庵

尋尺袈裟地依然列梵筵
高城分碧柳勺水得青蓮
幻化孤雲變聲聞獨鳥傳
會瞻千佛手一指借通禪

金昌亭偶述

錦浪逐蘭橈
桃花映畫橋
巫山魂欲斷
洛水影偏嬌
倚醉斜雲髻
臨風曳霧綃
當年溱與洧
芍藥戲相要

寄客

客夢天南樹
鄉心海北樓
悠悠流水恨
寂寂落花愁
道路孤蓬轉
容華清鏡投
鯉魚書一札
早晩過江州

燕居

衡門聊偃息
泌水可忘餐
黃鳥林中聽
青山江上看
雲

流石几淨花落竹房寒
短髮偏宜散何須製籜冠

豹孫宅賞芍藥花

芍藥何天艷叢開
遶翠帷差堪比西子真不愧南威映
笋光生玉侵衣色盡緋
彩雲看不散遲日共流輝

上方寺後港觀荷

芙蕖浮瀲灩鷗鷺亂汀沙
信是招提境偏開淨土花
練光搖白羽杯影泛青霞
歸棹何須急明星出若耶

山家賞菊

傍籬開種種臨水故娟娟艷豈從人愛幽偏得我憐杯
深傾葉底巾折墮花前五直師元亮沉冥不問年

治平寺朗公房看梅

野寺猶殘臘山窓見數枝衝寒頻索笑遲雪共題詩僧
懼看時折人懷賞後思何當留借榻清夢獨相隨

郊居二首

世守東陵業呼兒日灌園任荒張仲室不署翟公門綠
酒生平託青山寤寐言近因僧結社時過虎溪源

不畏灞陵尉田間每夜行狂歌逢楚士長嘯憶嵇生帶
月穿游屐携花插酒鎗春來常是醉無暇訪君平

過傅吳令衙齋夜坐分得山字二首

壺觴傳省內笑語隔人間疎樹含風進高雲帶鳥還畏
途唯赤日隱吏有青山何必絃歌聽方開莞爾顏

逃暑憐河朔携樽叩暮闕蟬遺涼吹遠鳥引綠漪閔擬
醉下弦月忘歸小隱山菱荷初製服沾濕露華間

樓居寄豹孫

宇內空無託，憑高祇憶君。
青山城不隔，黃鳥日相聞。
竹亂一庭月，花深半榻雲。
國香分在握，遙思坐氤氳。

秋日山齋飲客

寂寞一區宅，蕭疎萬里秋。
菊須陶令賞，山稱謝公遊。
岸幘青雲落，傳觴白日流。
放歌重徙倚，水上有高樓。

送公瑕丈

祖席依山水，行歌懷古今。
非應衰鳳德，猶自有蓬心。
霜樹辭春綠，雲峯變夕陰。
征帆且緩發，不忍斷瑤琴。

送穆常州擢大名

論道須公等為邦鮮匹儔
寇無容再借棠已任長留
繡斧花間驛霓旌水上洲
下車三輔地俠烈幾人收

送汝循秀才秋試二首

之子非干祿明時詔異才
短襦關外棄弱冠洛中來
綵筆仙郎贈荷衣少婦裁
秋風走馬處江上雨花臺

擬獻天人策都忘羈旅情
千花江口縣萬雉石頭城
得意從今日成名報友生
吾兒忝同學惜不與同行

山中對菊示友人二首

滄海心能遠青山道豈窮
烟霞雙屐下月露五言中
冥跡將鴻託巢居與鶴同
涼風天外起幽寂菊花叢

吾已遊方外人忘是故侯
匣琴山水曲杯酒古今浮
白石仙家業黃花隱者流
親朋無以報昨遣賣吳鉤

九日送客

兩人千里別九日一樽開
不是無家歎同為去國哀
楚帆隨月落朔雁帶霜來
何地堪回首前朝戲馬臺

京口鄔生雅好游忽貽詩以余善病而慰之賦此

為答

良朋多雨散生計總萍浮貧也吾非病何哉爾好游扁
舟常訪戴孤劔欲依劉行橐空如瓠神錢詎肯留

初春湖上訪顧始餘因留信宿二首

溪樹能藏屋行舟屢問人何知一區宅宛在五湖濱細
雨迎初服深杯遲早春無勞雞黍具門外可垂綸

不盡青山供偏容白鳥過百年人避世再宿客忘痾竹

葉比鄰美梅花古寺多還存幾兩屐一一問松蘿

春日端居謝都尉寄書至却報

春色何駘蕩幽懷只閉關長貧因寡累善病乃多閒有
雀堪羅徑無錢可買山故人勤遠念千里一書還

五言排律

春城即事簡傅明府於重玄精舍

茂苑今何麗三都昔並誇青山遙入郭滄海曲通槎鴈
塔侵霄半虹橋卧水斜微風江濯錦薄霧月籠紗魚躍

空潭藻鷺披芳樹霞言公猶有井潘令豈無花桃李三
千士絃歌十萬家行春鳧作鳥演法鹿為車震澤慈源
接靈巖覺路賒清暉寒照乘香界午排衙縮地瞻金象
彌天散綵葩宰官心不染肯漫悅紛華

花朝玄墓僧房對雪漫呈山甫

春仲冬為令芳辰霰尚催五湖同寂寞雙樹與徘徊舞
絮全迷柳飛花欲亂梅方令香霧雜暫傍土膏回綠草
仍餘白柔柯倏復摧朱英何失候玄鳥亦須猜初地慈

雲合諸天華雨來善消寧俟旭驟變恐驚雷清淨寒山
境圓通雪竇開無端空裏幻不盡劫中灰色界云殊勝
韶年惜易頽醍醐何處具分我最深杯

明霞篇與傅明府橫塘泛舟作

熠燿生殘照葳蕤滅綠烟嵌空雲乍染綴樹綺逾鮮積
氣千山變浮光萬象遷巔岬丹洞迥縹緲赤城連飛鷺
翔為嶺垂虹飲若川鎔金能布地剪綵欲彌天梵帝開
龍藏輪王現寶蓮蜃樓銀海結雁塔火珠懸亂石支機

下高臺行雨邊達觀俱是幻觸望總成妍徧拾渾遺世
恒餐不問年况逢鸞與鶴心賞自泠然

殘月篇傅明府衙齋和沈嘉則

既望弦將下徐齡魄未亡入風微透暈隱霧細含光半
露嬋娟影俄分叢桂香扇疑殘白羽鏡欲揜紅妝寶宇
修非久金樞壞不妨鬼方潛玉窟蟾尚戀銀潢映浦珠
難合沉波綺慢藏宮曾奔羿后樹已斫吳剛丸碎鵲驚
墮水消輪礙翔孤升經雁塞缺照度蘭房眉黛新猶好

容華盛豈常清暉如可翫徹夜只飛觴

謝都尉新樓落成與山甫丈各賦詩贈之

都護三秋構岑樓百尺楣芙蓉懸繡拱翡翠儼成帷木
末排精舍霞間寄遠思玲瓏雲入易窈窕月穿遲宛起
東山墅重臨春草池繁花茂苑借列岫敬亭移水市吳
兒楫城門齊女旗麗譙憑檻出朱塔傍簾垂燕子非其
類仙人於此宜徑開松欲礙客到鶴先知隱吏文無害
閒曹武不羈平原寧計日中散豈須期競病難為役交

騷更倚誰點何遲射覆慧亦慣彈碁君自留雙屐吾將
老一卮縱云居第美丘壑肯遐遺

具區明月與傅吳令九月望夜泛胥口作

澤國花成縣高秋桂作叢具區千萬頃皓月一孤蓬乍
可留山簡仍堪遲庾公渚光搖薄霧波響逐回風世界
虛無裏人生泡影中圓時非有相明處盡皆空雲澹澄
如練星疎炯若瞳峰真為縹緲樹已近冥濛禹迹應非
遠秦餘儼在東孤猶飄露白楓欲候霜紅不暗心疑曙

無邊目豈窮山陰今夜似彭澤幾人同郢唱全飛雪雄
談半走虹商家欣有說吳下惜無蒙豈是悲籠鳥俱為
羨遠鴻萍浮猶聚散金石此情衷

人日與客北寺觀塔燈分得青字二十韻

鴈塔騰十燄雞園報七寔聖燈元普照慧火亦常熒熠
耀俱圓影氤氲總異馨雲霞標鷲嶺霄漢響鸞鈴銀燭
龍銜架金繩鳳啓局未雷簷走電不夜戶垂星輝映珠
為幌烟浮翠作櫺鏡紛臨綺閣燎儼集彤庭百尺鮫人

幔千層雲母屏寶輪風乍轉玉磴月初停佛宇誰遺爝
禪宮孰聚螢毫光寧盡白香藹若非青一悟無邊朗三
摩了自惺空華聊聚散業果任沉冥舍利如來藏頻伽
不壞餅有天名善現隨地性通靈所見皆離見其形非
委形化城看倏變法界倚長寧蘭若恒如晝菩提豈易
暝願言分一點昭澈誦遺經

送西河居士天池山檢大藏諸經二十韻

獨往超凡慮幽棲出世情祇陀移茂苑舍衛儼吳城妙

相青獅擁真文白馬迎峰蓮千仞秀天鏡一池平小證
沙門果新持淨業盟啓函飛孔雀齊帙轉流鶯夙習鳩
羅譯通教龍象呈騰音潮噴遠零座雨華輕夜誦山皆
應晨叅僕屢更白頭三藏徧緇服五禪并蒲塞慈雲饌
優曇甘露英月留圓處影泉入定中聲居士重逢蘊微
君再見明鈍根當自斷慾劫此堪驚貝葉翻偏好韋編
續未成有因終有漏無性即無生梵篆非蚪斗番言是
鳥鳴達磨不立字究竟亦何名議界俱空境輪迴悉妄

行吾將求解脫送子息心旌

敬美丈解關中學憲歸隱海上過訪漫呈二十二

韻

海岱百靈集乾坤二美俱含香金殿直尚璽玉墀趨人
望東山重天文北斗殊植能雄七子雲豈負三吳賦就
張愁逼書成賈策迂匡山初捧檄渭水再分符飛瀑裝
官索橫汾紀宦途行春恒露冕消夏只冰壺憂悄非因
鵬思深寧為鱸鬚從臨郡白眉以入宮枯山宰曾無託

嵇公自不孤，竭來遺敝屣。翻使乞前繻，同是攄忠盡。終
焉戀友于，紫霄回雁序。碧沼引鸕雛，雖貴豈驕人也。醒而
狂者乎，有田元是介。無谷不名愚，潘岳園千畝。揚雄宅
一區，鳳笙來子晉。鸞馭遲麻姑，得失嗤鴻寶。行藏笑野
狐，清齋同佛願。止觀學僧趺，猶自精詩律。依然問酒徒，
何方有員嶠。吾道久乘桴。

除歲卧病卷馬空門之思，緘報沈嘉則丈二十二

韻

除歲若為逼頻年苦不登近懷同逆旅遠訊阻良朋棄
置復誰道孤危莫我矜金從索底盡絲向鏡中增智豈
營三窟窮猶夢五陵喜為游俠行羞作蹶張稱玩世狂
司馬還鄉老季鷹補裘多以線握粟少於升履敗恒穿
雪瓢存但貯冰嘯歌雖不廢杯勺已難勝湘水沉非易
藍田卧自應牝雞家故索塞馬事無憑俗薄君平棄情
疎季子憎莫愁那可得去病亦何能豈曰貧而怨還將
忿是懲覲顏仍住世被髮且為僧欲借松龕隱寧辭蓮

社徵白雲方外錫紺宇佛前燈昔去追中駟今來寬上
乘玄言盈大瓠長物半枯藤淨海真堪蹈靈山盡可凭
行藏殊隔絕緘報涕垂膺

詠嘉平雪二十四韻

嘉平月旣望霰雪日交加颯沓過山郭飄零遍海涯兆
豐為地瑞不染是天花入水看無別隨風聽有譁踐形
憐倏變呈象惜俄差圭復能成壁瑜真莫掩瑕暗添青
鯉漲明積白龍沙窒隙穿來細搏空引去斜幻時瑤島

合迷處玉樓遐誰種玲瓏樹還開清淨葩飛英爭墮盡
舞絮漫隨車寺失黃金布峰留鷓練遮難昏頻起鵲易
曙驟驚鴉蝶冷莊周夢鷗輕范蠡家夜光含素霓寒影
結青霞珠浦雙遺佩銀河一問槎褰裳霜緣履捲幔霧
籠紗朔氣橫征鴈陰雲濕暮茄謝衣沾自好剡棹興偏
嘉鶴髦王恭適狐裘晏子嗟槁顏今起粟蓬鬢乍生華
僵卧何堪穩清醑尚可賒郢人歌寡和梁苑賦新誇染
翰冰嘶滿淋漓字若麻

詠吳市燈二十四韻

吳兒一何巧能事匪師傳剪綵千葩散泥金四照聯象
形元以類物態豈云遷好鳥忘春囀靈花總夜妍使星
槎影動奎宿斗光躔鳳振臺端羽龍垂燭下涎九微含
翠葆三豔倚朱絃芝蓋如雲集珠毬比月圓幻將風裏
蝶現出火中蓮紫炁遙堪把青輝藹自鮮六鰲浮作地
七寶聚為筵仰見行空馬回看跼水鳶蛻虬唯骨立畫
虎但皮懸兔搗姮娥傍鷗栖菡萏邊冰壺寒瑩魄玉樹

金定四庫全書
卷七
煖生烟城郭寧知夕歡呼定有年冶郎方並屬游女復
齊肩戶外皆盈繡人間盡挾仙障偏圖孝節屏乃繪忠
賢故事村翁識竒觀稚子憐珊瑚雕綺席犀兕刻觥船
有燄俱成燼無灰不可然豈須東壁白暫照草亭玄萬
劫常明者熒熒古佛前

郡大夫嶺南陳公下車以來余未修謁乃徵傅吳
令言忽枉贈章獎許太過兼憫困窮不揣陳說
平生以當執贄詩成三十韻

余生本椎魯家世服橐鞬卻穀從吾好毛萇授爾言雄
心追定遠長技怯樓煩螢火偏能集韋編不厭繙并忘
魚在釜寧羨鶴乘軒三黜偶齊惠沉酣詎比髡弓弣消
月影甲繡盡苔痕投壁宜遭劍彈冠反戴盆蛾眉羞再
畫駟舌亟須捫野性拋雞肋霜蹄蹶虎賁蓬蒿張仲室
鳥雀翟公門一葛何曾續聊饗孰繼殮寒泉濯以潔晴
旭負之暄減產至空壁為傭且灌園土澆吳伯里俗薄
買臣村羽鍛悲籠鳥途窮歎檻猿亭爭留故尉市慣辱

王孫稚子皆來笑公侯敢去援幸逢齊傅琰得御漢陳
蕃况見德星聚還看威鳳騫回翔空五嶺睥睨小中原
飛翰金飈迅垂函玉露繁南邦孔翠穴大海明珠源白
羽邊書靜朱絃郢曲翻狂猶思魯士忠許弔湘魂覆瓿
終捐棄雕蟲幸記存雲泥誰隔分風雅願同論官橐冰
壺冷公庭玉樹溫徒懷襴衡刺未共孔融尊欲遂稱知
已居然說感恩

仲兒起文以壬午仲夏補博士弟子員率爾志喜

兼用為助果有寸長當有徵於斯言也凡三十

韻

武功開代邨薄祿寄吳城乃乏強弧力而多柔翰情生
兒憐汝慧教子愧余傖仲也當如仲卿還自用卿經才
明大戴文未準西京白面初求試青衿乍剪成籍通秦
博士員備魯諸生縫掖欣從事加冠顧美名喜真如捧
檄望已愈招旌木鐸宣王訓韋編課士程五車何必泛
一藝轉須精爾雅宜循式偏奇莫憚更便堪高第置徐

與計偕行班曷為投筆終安用請纓泮流方渙渙我漸
以菁菁章句昔云鄙賢科今最榮鴻恩蒙累葉燕寢夢
延英八口將誰哺三年待爾鳴寒門當極否衰運敢圖
亨積草庭難過編蓬戶半傾董帷寧晝下孫業亦宵征
不諱言干祿差強務耦耕養雛猶枳棘舐犢尚柴荆未
信眉偏白還看角且駢儻來馬有意非分肯徒營願豈
過三鼎人將老一鎗丈夫多激烈志士絕肥輕敝帚藏
而父遺簪畀汝兄兄期修世業弟勉振家聲莫謂吾潦

倒斯言可蒞盟

梅花篇初春偕山甫始餘長倩三隱君及兒子允

文過湖上鄧尉聚塢諸山為十日游製三百字

載酒出山郭探梅過水涯客閒來看早歲閏較開遲漸
以明村落俄將暗路岐縱橫亂若薺遠近積如茨無間
阡連陌寧分隴與陂盈門春爛日比屋素封時皜練千
箱啓珠璣萬斛遺叢叢藏古寺寂寂壓疎籬比麝香逾
遠成虬影太奇瑤林仙圃接玉樹謝家移秀色堪容與

寒光更陸離鱗鱗紛蘇甲鶴鶴儼花枝南國憑傳信深
宮任點眉晴猶溽雪片暖尚挺冰姿穠李何嗟及夭桃
奚以為未開先自潔縱落亦無疵明燭當宵照清泉傍
曉滋掃英童並戲啄燕鵲爭窺弄笛從吾好調羹匪爾
思孤高偏被嶺宛媚故臨池即是山之利還為土所宜
好留明月伴忍負白雲期但許幽人識那令顯者知間
松貞不愧倚石介同持便可携琴往誰當荷鍤隨杜陵
唯索笑何遜獨題詩彭澤忘栽柳商山罷采芝興餘剡

水曲住徧輞川湄勝事良堪紀芳辰不可追斯游殊汗
漫聊且解人頤

伐檀齋集卷七